

ԱՇԱԿԵՐՏԱՐԱՆԸ

Աշակերտարանի եկեղեցին նորոգուեցաւ Խաչակրաց կողմէն, 1102-1106, և փոքր աղօթարանի ձև տրուեցաւ և կոչուեցաւ Հայր մերի եկեղեցի: 1152 ին, Տանիմարքացի երկու եղբայրներ, մին ծովապետ և միւսն եպիսկոպոս, այցելեցին այս եկեղեցւոյն, որ փոքր և խղճալի շէնք մ'էր: Երկու եղբայրներն իրենց ծախքով վերանորոգեցին զայն և ըստ կտակի թաղուեցան հոն: Այս դարուն Աշակերտարանի նախկին աւանդութեան վրայ աւելցան նաև Առաքելոց Հանգստանիսն և Հայր մերի նոր աւանդութիւնները:

ԲՂՈՒՐԸ

Խաչակիրք Բրի եկեղեցին 1099 ին վերանորոգեցին և յատկացուցին պաշտամունքի ժողովներու և վերածեցին իր նախնի պայծառութեան, ինչպէս միւս սրբավայրերն: Անոր յիշատակը երկար ատեն առաւելակշիռ մնաց Զիթենեաց լերան վրայ: ԺԲ. դարու ուխտաւոր ուղեգիրները հետևալ կերպով կը նկարագրեն նոյն եկեղեցին. քսան աստիճաններով սանդուղ մը կը գտնուէր անոր առջեւը, որուն ծայրի սրահը կը ծառայէր իբր գաւիթ, եկեղեցին, առաջուան պէս, արտաքին բոլորչի պատով մը պահպանուած էր. ներսի կողմը կար մարմարինոն սալարկուած սրահ մը սիւներէ բռնուած կամարով մը: Գեղեցիկ նկարներով և քանդակներով զարդարուած էին որմերը: Աւանդական յատակագծին համաձայն, շէնքին կեդրոնը ո՛չ տանիք կար և ո՛չ ալ գմբէթ:

Իսկ գալով այն փոքր շէնքին, որ կը գտնուէր բացօթեայ մասին ճիշդ մէջտեղը, ոչ թէ Բիւզանդացւոց ժամանակի պղնձէ շինուած այն պարզ շրջափակն էր, որ կը պարունակէր ուխտաւորաց բաշխուելիք նուիրական փոշին, այլ կապուտագոյն երակով ձերմակ մարմարէ ծածկուած կլոր փոքր աշտարակ մը, որուն վրայ կար փոքրիկ գմբէթ մը, գագաթը բաց: Եկեղեցւոյն մէջ կար նաև ժայռի մը ցցուածքը, որմէ ուխտաւորք մասեր կ'առնէին և կը համբուրէին, մտածելով որ անոնք կը կրեն Փրկչին ոտքերուն հետքը: Ինչպէս երբեմն փոշին բովանդակող փոքր աշտարակը, նոյնպէս այս ժայռին ցցուածքը կը գտնուէր զմբէթին ճիշդ բացուածքին տակ. և անոր վրայ կար սեղան մը